

Radiokkut tv-kkullu aallakaatitsisarneq pillugu Inatsisartut inatsisissaattut siunnersuut
(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

Saqqummiussissut

Siullermeerneqarnera

Naalakkersuisut sinnerlugit matumuuna Radiokkut tv-kkullu aallakaatitsisarneq pillugu Inatsisartut inatsisissaattut siunnersuut saqqummiutissavara.

Siunnersuutikkut pingaarnertut anguniagaavoq radiomut tv-mullu tunngassuteqartuni pisariaqartitat paasineqartut naapertorlugit inatsisit atuuttut naleqqussarneqarnissaat. Tamakkua ilaat KNR-ip piffissami 29. oktober 2012-imiit 15. december 2012-imut misissuiffigineqarneranut atatillugu arlaannaannulluunniit atanngitsunit Epinionimit ilaatigut erseqqissaatigineqarput. Tassunga atatillugu kaammattuutigineqarpoq KNR-ip siulersuisuisa katitigaanerata pillugu aalajangersakkat allanngortinneqarsinnaanerata eqqarsaatigineqassasoq. Taamaaliortoqassaaq suliffeqarfiup pingaarnertut aqunneqarnerata nukittorsarneqarnissaa siunertaralugu, KNR-ip siulersuisui sunniuteqarnerulersinniarlugit, siulersuisullu aalajangiisinnaassuseqarnerata nukittorsarniarlugu. Taamaaliorterup ilaatut siulersuisunut ilaasortat ikilineqassapput, soorlutaaq siulersuisut piginnaasaannut piumasaqaatit sukaterneqassasut. Tamakkununga atatillugu allanngortitsinissat pineqarput KNR-ip nammineerluni kissaatigisarsimasai.

Taamatuttaaq siunnersuut Atuisut Siunnersuisoqatigiiviniq pilersitsinissaq pillugu aalajangersakkamik imaqarpoq, assigiinngitsunik soqutigisallit KNR-ip siulersuisuinut isummaminnik saqqummiussisinnaanissaat qulakkeerniarlugu.

Inatsisissatut siunnersuut inuiaqatigiit pillugit innuttaasunut pisortat paasissutissiisarnerata malittarisassaqaartitaaneranik imaqarportaaq, aallakaatitat taamaattut ussasaarutillu akornanni killiliisinnaaneq pillugu nalornisoqalinnginniassammat.

Tamakku saniatigut pisariaqartinneqarpoq najukkani radiokkut tv-kkullu aallakaatitsisarnermut tunngatillugu tapiissuteqartarnermut malittarisassat allanngortinneqarnissaat, soorlutaaq siunnersuutip aamma imarigaa inuiaqatigiinnut paasissutissat innuttaasunut nalinginnaasumik soqutiginaatillit pillugit nalunaarutiniq aallakaatitsisarnerit paatsuugassaangitsunik malittarisassaqaartitaanerat.

Peqatigitillugu oqaatigineqassaaq siunnersuut Namminersorlutik Oqartussat malittarisassiortarnerannut tunaartarisassat malitsigisaannik ataatsimut inatsimmut siunnersuutitut suliarineqarmat, inatsisartut peqqussutaannut atuuttumut allannguutissatut pinnagu.

Taamatut oqaaseqarlunga siunnersuut Inatsisartunut ilalaartumik oqaluuserisassanngortippara.